



金華山樵詩前集序

荔扉先生懷才莫展屈爲魯南學博鬱鬱居此土者五年矣余來入幕是州因與相知每出其所著述示余詞賦詩文積卷成帙而詩爲更富余受而卒業悲歎慷慨有如唐夢賚之哭法若真之笑半生之抑鬱已盡見此哭笑中幾欲使懷才不遇者共發一哭且發一笑也間嘗與余倡和不絕益知其抱負一日酒酣傾談及所得力處謬以余言爲中遂囑余爲序余曰噫君何言之誣也君不云乎人之知我不若我之自知爲真長安顯者之言皆所不屑又何

屑於余言曰否非不樂顯者言第恐其知我之不真耳君能知我又何不樂爲我言誠若是余且試與君言之莊子曰丘山積卑而爲高江河積水而爲大又曰萬物殊理道不私故無名無名故無爲無爲而無不爲至有所拂者而有所宜自殉殊面有所正者有所差如君之博覽羣言是積卑而爲高合水而爲大者也所爲必取法乎古人是萬物殊而理道不私者也自可無名無爲而無不爲矣又何有遇有不遇焉夫豈非有所拂而有所宜乎嗟乎劉蕡下第千古同慨君七人試而七見黜必司命者自殉其面使君抱玉而泣不獲馳騁於石渠賡咏於廟堂致以明良喜起之歌而爲風雲月露之詞濟世安民之畧翻成弔古感今之作也然而遭際不窮爲詩未必益工故杜甫因窮愁抑鬱垂老苦吟而成詩聖茲君之詩韻調軒昂一洗世俗屑廓之習將見價重鷄林安知非際遇之輒軻卽造物之所以玉成其詩各乎况年方強仕振鐸爲治化之源他日挾纊而起得展其才則又無爲而有以爲矣余之知君若此幸毋以踏踏自餒也

皆

乾隆五十八年歲在癸丑仲冬松月居士梁金書於魯南
刺史官署

稿起於戊子也附以己庚辛之所作題曰幼學吟方是時
始知向學以學吟非以幼吟也壬辰歸自晉寧硯北南池
結社紫薇山房相拉入會凡二載集以地名兼紀物也甲
午春柏軒約赴炳如庄借筆最博制舉業人事牽率未獲
往祇就家中日課一篇餘以詩聞之課之餘卽詩之餘也
榜後北征栗亭同牌剌翁葦塘同影公車上此唱彼和昔
人云處爲遠志出爲小草回憶午未之役予之心猶覺怍
怍然也未夏抵石碑溟渤風潮近浮几席由丙申以至戊
戌金臺渝關數寄游踪然於海則嘆觀止也兩試旣報罷

渴疾遂成己亥之語語於病病於秋也庚子仍落孫山外
假館秀雲氏淶水芙蓉倚風自笑言之不足故長言之也
辛丑遇大挑送人作郡歌驪者半天下情所獨注意不容
默也壬寅葺我西軒爲習靜計而旱魃肆虐民情汹汹
園有憶憶之斯彙之也噫吾生忽四十有奇萃十五年之
精力所得僅此幼學吟也紫薇山房集也存者一刪者九
也課餘集北征小草也刪者七也存者三也觀海集刪存
各半也秋憲病語芙蓉館集存者六刪者四也存而又刪
者一則存者亦五也金臺折柳集西軒彙稿也則存者八
刪者二也刪之者誰筠心習菴兩先生也師也葑洲先生
可以師者也南園先生蓋友而進於師者也壬子小除書
於劍湖學署之望雲堂

金華山樵詩前集題詞

壯哉大集裝盈尺令我捫舌而驚魄河嶽星辰胸萬千蟲
魚草木篇三百出入陶謝宗杜陵韓蘇而下兼採擇音韻
長短無不諧字句推敲孰能易案頭展誦聽雲韶紙上有
聲作金石公車應召隨計偕名流倒屣成莫逆對客揮毫
盡碎金懷珍待聘如完璧置身若在翰苑班掄才定冠金
圍籍一朝雁塔罷題名六月鵬程懶振鬪省親官舍遼海
邊盧龍古塞連京陌望海常傾李白杯登山幾着阮孚屐
詞傳七十五長亭詩備三十六新格宋玉高唐夢豈真陳

思洛水情聊適趨庭之暇擁百城研丹吮墨窮搜摘鄉心
蓬勃值芳辰壯懷蕭索逢除夕打頭屋號書畫船浮均水
認烟波宅梁鴻竄跡十四年賈誼上書凡六策承恩授職
師儒官苜蓿盤殮比燔炙蒼山之麓有吾廬劍湖之濱開
講席坐乏寒氊鄭廣文門裁五柳陶彭澤天倫無故至樂
存與古爲徒實心獲寧若俗吏趨風塵儘有佳懷賦詩冊
怪君傑鰲似少年感予偃蹇傷疇昔弱冠琴書浙水才廿
年詩酒長安客阮狂對我眼長青馬氏誇余眉最白魚目
珠東易混珠龍門欲上翻點額坐使英雄莫展籌悔將歲

乞拋擲官如孟尉但哦松筆慙沈約能銘栢浮沉宦海
又逢君指點名山欲挂席相慶難彈貢禹冠相規勿現王
喬鳥三復君詩聲轉澁丈夫處世嫌拘掎爾我都緣性未
馴不羈馬怒猶開柵好作老僧風月談休發高歌鬼神責
亦雀乘風亦有時蛟龍失水遭戲劇富貴逼來等浮雲在
山出岫無拘迫夢耶蛇耶雨不知惺惺自古惺惺惜耽吟
仍是好名心摩挲盥題詞絡繹噫嘻張也難與爲却笑師
也過猶亦

甲寅長至錢塘張霏拜題於井署之紅蘭書屋

金華山樵駢枝集自序

元同生四不得志於春官退處海濱寂無與語出篋中詩
編爲一册題之曰駢枝集駢枝雖病乃與生俱來者予詩
猶是也夫拇固不宜有駢指固不宜有枝第天既枝其指
駢其拇而人亦安之而弗苦習焉而若忘使一旦起而強
去之則必爲拇與指之害也明矣予年甫束髮卽愛爲聲
韻之學風雨寒暑羈旅疾厄有專焉無或閒也故當其冥
心以往則若癡拍手而吟則若狂極狂與癡之所形父師
斥之妻孥笑之親舊規之流俗人譏且訕之予則一無顧

息二十年來所得不下五千首屢經芟蕪尚餘其一其間
卽性情推襟送抱凡予之遭逢閱歷罔不於是乎託後
之覽者或由是而見予之爲人識予之居心焉然夫子之
訓小子曰詩可以興可以觀可以羣可以怨又一言以蔽
之曰思無邪而時賢言詩則曰我宗漢魏宗唐宋否則曰
我師陶謝師李杜不識其性情襟抱果無異於陶謝李杜
之性情襟抱與遭逢閱歷果有類於漢魏唐宋之遭逢閱
歷與江心爲志發言爲詩詩者獨造之物耳近時李鏡君
顏幼容皆先得予心之所欲言李之詩清雄博與顏之詩
高明伉爽時則春陽已敷草木怒發時則秋霜乍落江山
爭露至其激昂頓挫風行電掣則又有不知其然而然者
噫古人已往壯歲曰非惟視故技猶不過若唯之與阿其
有負於初志不少矣他日者薄有成立歸老莘村睡餘支
枕飯罷尋廊或能更有述焉未可知也是爲序

昔

乾隆四十八年歲次癸卯夏四月古河東師範題於右北
平石碑嵯署之西軒

金華山樵研露集序

扶大雅之輪斷推巨手樹騷壇之幟允重清才六代鶯花
漸迷漢魏三唐旗鼓大振齊梁綺麗餘波當掣鯨魚於碧
海飛騰前路定騫彩鳳於丹山惟洞觀不昧中聲斯派別
俱歸詰匠如 荔扉先生者乘龍才子跨鶴仙姿揚洱海
之洪波文心印月騁燕山之長騎俠氣凌雲六上春官猶
滯請纓之迹十年子舍獲伸舞綵之娛聯舊契於琴尊重
翻盡簡訂新交於花月疊譜雄詞蓋含章久富三通而體
物愈工四始寫半生之豪宕駿馬奔泉懷曠古之風流鳴

金華山樵詩集
一
鳶聳翅窻鷓階蟀時增爾雅之箋河鯉山雞盡入齊諧之
志雖紅裙翠袖亦縱新聲而芳草美人無乖正軌八叉手
居然神技長爪郎豈必鬼才拾厥碎珠合成完璧出錦囊
而索賞臨青案以皆芳周也一劍摩挲六經鹵莽憶從東
髮卽聞父執之稱漸領長歌實備風人之旨照來肝膽灑
灑秋露之清洒去烟雲滴滴春華之艷駢枝集波瀾壯濶
已窺香象之踪研露篇樓閣重新復見羚羊之角顧此徐
吟緩轡定在端門那期馱夢乘驢終隨庾嶺材真天老必
教吸盡西江力可人爭自有輝揚北斗心焉歲寫徒深仰
止之私與忽飛揚敢冒知言之贈

乾隆五十二年歲次丁未夏五月哉生明世愚姪方學周
拜題於京師鑲紅旗官學之棗香書屋

南還紀行序

荔扉居北海者十餘年始博一廣文奉其親

裕亭先

生歸里家人婦子間關轉徙無往非鯉庭佳境况問途如
故觸緒生新有所吟積次成卷題曰南還紀行與予遇於
玉龍山下出爲下酒物且命序其端余謂吾人之爲詩若
文必有所歸宿而後可以見志今荔扉讀破萬卷往返二
萬餘里凡於平原廣陌都邑之壯麗人物之繁盛山川之
清美江河之奔放古帝王將相忠臣孝子學士大夫騷人
遷客羽流豪俠之遺蹟以及蛇龍蛟蜃之所居狐狸豺狼

之所嗥漁樵耕牧所逐隊出入謳吟而上下之境無不因風雨雲霧日星月露之所麗發爲樂府歌行古今體以寫其性靈而歸宿於奉親而返由此觀之可以見荔扉之志矣余與荔扉皆滇西落拓人上不能爲楊文襄之出下不能爲孫布衣之處且並不能如南園竹林羽豐可石諸君子之翱翔仕路乃徒與柿園望山玉圃滇洲輩僕僕長安道上歸而與簪崖琴山幼瑗鍊峯作高陽侶則亦安用此數千百言使後人哀之而不鑒之耶雖然士自束髮受書卽聞何莫學詩之訓果忍而與此終古是必昧興觀羣怨而絕無性情者也余固知之而不能言之回憶曩歷此途如行鄠城隆中道上覺銅馬帝君臣武鄉侯部曲不啻慶雲之在霄也東里峴山遺愛至今猶存乎若夫朱儼湯陰以及大洪容城保定則武穆旌旗及三忠頸血所濺均足以驚風雨而泣鬼神又如龍場古戍伏波遺祠雖荒草頽垣雜於瘴雨蠻烟而道學邊功巍然南服猶經其地者所不能忘荔扉能以杜陵之筆寫阮籍之懷洵可謂先得我心而過邯鄲上潁橋適大梁身世升沉之感旣憾我不見古人亦憾古人不見我猶思訪周司農彭方伯而一詢其

里門之遺軌云第馮唐易老前路茫茫作者雖氣蒸雲夢
波撼岳陽而赤壁空說孫曹黃鶴尙留崔李其能起禰正
平於鸚鵡洲邊共採沅湘之蘭芷歟嗟嗟世事一黃梁夢
耳昔之豪門已成蓬戶而要必留此茈茈者以存正氣荔
扉官雖冷橐雖虛而富於詩信於朋友風流自賞菽水承
歡是其天爵已尊吾安知其不由一瓊而臻魏鄂之功業
耶自今以往願毋忘楚黔之險洞庭之濶盧龍碣石之蒼
涼莽蕩鍊其詩勵其行卽以 裕亭先生之訓教若子與
劍湖弟子俾皆能和聲鳴豫垂令名於無窮則較之康樂
柳州之僱工於賦山水者不已相去逕庭哉言之當否吾
不知請還以問之簪崖琴山幼瑗錢峯將以爲何如也語
竟但見玉龍晴雪霏作千樹梅花如巡檐索詩狀荔扉遂
爲余題春雲歸岫圖一章而去

乾隆壬子冬十月中澣韋池袁文揆蘇亭氏叙於白狼郵
亭之西舍

荔扉詩序

師氏多奇人晉有師曠漢有師宜師丹曠則以琴名宜則以隸書名丹則以說詩名曠之琴一鼓而元鶴舞再鼓而風雲變宜之隸書嘗不持錢詣酒家書其壁觀者以酬酒值丹之說詩世重儒宗曾建十四議爲國社稷臣此皆天畀之以聰明復自全之以人事而後能擅其奇也余來刺魯南宿黔之坡貢見壁間有小憩繁花塘之作清新俊逸心竊嘆賞及觀其姓字乃知爲滇南師君荔扉也遂識之弗忘而不知能遇其人否旣至滇則師君卽魯南學博好

其人而卽共事一方良緣夙締亦何幸歟抵任後相見甚樂且袖其北上往還之集以示余曰出岫曰彈劍曰歸雲余受而卒業不禁擊案稱快則前之所見者特鼎中一鬻耳師氏多奇人而學博之詩更有兼曠宜丹三者之長之奇者何也言山而峯巒聳峙言水而波浪迴環言風而金飈四起靜則水秀山明動則雷轟電掣譬之出岫之雲無奇不備固足與曠之琴同聲相應也所謂彈劍者亦感遇云爾以學博之詩當如韓舍人之春城飛花名達天子持較宜之隸書爲觀者酬其酒值抑末矣况工於詩更工於

歸雲廣文教於一方又不幾如丹之世重儒宗乎且年力壯而經濟宏又見其出岫而起搏雲而上宰輔國家如丹之爲社稷臣應自有日卷之返乎太始放之彌乎大千夫豈學博之虛語以自矜也哉此余所謂能兼曠宜丹三者之長之奇者也余以早年宦遊案牘勞形荒於子墨未可與言詩然雖不長於詩而癖於談詩魯南地僻事簡公務之暇杯酒酌相邀聆君新詩破岑寂而過夏以慰余一見心折之殷樂可知也不識以余爲盲人說路而亦與談焉否

昔

乾隆癸丑歲仲夏月桐溪馮津序於魯南官署之絢秋書

歸雲集自序

庚戌之役樵已七黜於春官榜發後擬登岱宗且作淮上
遊謀之禮曹椽皆以官限甚嚴辭無已必報病方可予曰
嘻非病而以病請是欺也遂決歸計五月十二日冒暑就
道於直隸則清苑而高邑於豫則湯陰而衛輝而南陽於
楚則襄陽而武陵而安化於黔則鎮遠而貴筑於滇則尋
甸而昆明凡十二歇而後抵家甫三夕倉卒回任則已屆
十月之初四中惟清苑則以熱衛輝則以雨昆明則以病
餘則皆以友或以師爲時者三爲月者六爲日者一百四

十二共成詩二百一十首有奇手自編次名之曰歸雲較
出岫集則加以倍焉今夫雲也者善乾坤之用通山澤之
氣獨石而出膚寸而合其爲體也隱而顯五色成慶三色
成霽其爲象也正而葩如積水如白鶴如赤珠如冠纓上
如羊下如礪石又或如布如日如車如馬如輪如絳衣如
龍如困其因乎時而應乎地也奇而有法變而不片其
行也放之則彌乎大千而其歸也卷之則返乎太極之
知雲之所以爲雲歟客有瞿然而前者曰予之知雲也
矣究于詩乎何與某嘗竊聞之雲者云也雲云

所運云其所云是卽吾子歸于雲南之所作耳何必括雲
囊翻雲海挽雲將之袂褰雲英之裳極妬羅妙髮之致窮
從龍于呂之能而使愚者驚智者惑哉予心嚮其言乃掩
卷以告之曰僕之說似鄒衍談天郭象註秋水君之說似
王弼講易戴憑論春秋第一則曰出岫再則曰歸雲出者
倏而歸則歸者安知其不倏而出試以君之說爲主而僕
之說爲輔可乎客亦首肯遂錄之以爲歸雲集敘若夫登
臨憑弔之跡舟車水陸之程江河林壑之雄絲竹文酒之
樂則有詩在覽者當自得之

金華山樵言集
二
乾隆壬子閏四月旣望金華山樵師範題於劍湖學署之
史憇軒中

出岫集自序

出岫集者金華山樵再上都門之所作也樵自丁未挑二
等補訓劍川時家大人方得歸林請舟車之費半賴周
張遲至戊申之八月始克抵劍劍於滇爲西北隅出境未
百里與番戎接然湖山佳秀氣候清和苟小有蓄藏頗足
自快奈米鹽零雜勢必有不切之務日來牽擾求所謂把
酒臨風揮毫染翰之樂竟渺不可追卽間有而節促音繁
持較曩日之吾若出兩人焉巳酉冬思借公車爲薄游計
於十二月望六日出省次年二月之廿六日入都爲程七

十共得詩百許章倚馬聯吟扣舷擲韻情所萌拆不覺其
一往獨深昔之格格不吐者茲且汨汨其來矣昔之寂寂
無踪者茲且滔滔不竭矣夫乃嘆詩之工拙生於境而境
之大小徵乎詩使於首菴盤頭忽創此新聲不已有昧於
說詩之旨哉回任後編錄成帙每當無事把玩不釋手蓋
如山雞之自愛其羽或曰子誠善於詩顧聞子之友多長
安顯者胡不求其一序庶行之愈遠而傳之愈永乎予曰
噫劉彥和著文心雕龍自負車前以干沈家令左太冲賦
三都成踵門謁皇甫士安讀史至此未嘗不心竊鄙之枯
桑知天風海水知天寒人之知我究不若我之自知之爲
真耳况出旣無心之出詩亦無心之詩行之弗遠傳之弗
永又何足爲予病歟或曰子之南還紀行也曰此生如浮
雲焉能定行藏入岫而出岫斯言誓勿忘然則子之自名
之而自序之也固已久矣予笑而不答遂彙其語於篇首
且以博觀者之一哂云

乾隆辛亥立秋日金華山樵師範荔屏氏題於學署之史

懋軒

彈劍集自序

往予自樂亭赴春官試榜發卽趣車東下距石碑場三五里而遙望庄西靈澤寺鴟吻紅墻隱隱露林際頓覺心神爽豁嗚御者疾馳抵署開海上舟出所購新書逐次研索無間昕朕幾不知有報罷之感者由乙未以逮丁未皆如此雖北地嚴寒酷暑十倍雲南而予顧安之夏或一笠一屐一瓢一扇携坐具跣趺綠陰中狎鶯燕辨粳稷細味田園佳趣冬或單裝怒馬縱鷹犬海灘間搏飛擊走與畿輔諸右族各較所獲之多寡以博笑凡一切服食起居匪惟

不適有益便焉語云習俗移人賢者不免予何能賢然其所以移之者豈無故哉庚戌春重來作游人去別時未三載乃叠遭旱澇百物騰貴風景不殊而人事之變遷判若霄壤惟手種楊柳十餘樹送黛搖青亭亭於暮烟斜照之表撫今追昔曷勝黯然而得詩二章附以京邸並津門東安路途之所作編爲一冊名之曰彈劍集夫常恐秋節至涼飈奪炎熱意淒而詞婉此匹婦之無聊也臨河濯長纓念子悵悠悠志高而言壯此丈夫之不遂也東西安所之徘徊以仿徨心孤而情懼此閨房之悲極也朔風動秋草遊馬有歸心氣寒而事傷此羈旅之怨曲也賦詩者卽境以抒情而讀詩者因情以會境反是句雖工奚益予旣以丈夫之不遠兼羈旅之怨曲則是集之成意固淺而詞固質然使彈劍以歌之我知其必有合於古人矣若徒執食無魚出無輿之說以求之是猶有筌蹄之見者存而非予之所謂詩更非予之所謂彈劍集之詩也

乾隆歲在壬子天中後一日金華山樵書於劍湖學署之

史憇軒

考績吟序

文章事功原屬兩塗惟通人則有以一之趙州 師君蒞
扉以甲午舉於鄉爲亞元出老友屠公笏巖門名藉甚已
而除劍川學正垂六年其教成士爭趨之戶外屢滿聲聞
於大府當甄績時屢檄徵之自署起行所過山川名勝必
題詠畱省城數月所作尤多計其往返得詩百數十首題
曰考績吟今夏北上過省屬爲序之蒞扉以詩名雄海內
西南陬則文章也今出而爲吏膺民社則事功也事功以
文章爲本子游子夏皆列文學之科子游宰武城以絃歌

爲治其曰君子學道則愛人小人學道則易使夫子嘆而
是之又得澹臺滅明相助爲理此其事功非出於文章乎
子夏爲莒父宰子告以毋欲速勿見小利史又稱其居西
河魏文侯立之十八年受經子夏則距孔子之卒已七十
有二年是時子夏應百餘歲田子方段干木吳起禽滑釐
猶受業焉惟不欲速不見小利始達而成大事至於老壽
獨盛於諸賢要皆由文章致之也夫能員幹吏趨逐於事
功當時非不共相矜尙而卒於易敝惟以文章爲吏治榮
世壽世赫赫以至於今君鄉先輩王端簡趙玉峰皆由外
吏躋顯列端簡因文襄薦引定天下財賦至今守之玉峰
居銀臺建郡縣臺灣之議利在後世此其事功爲何如至
李中丞瀛仙以教官爲知縣時已中年後開府湖南其功
烈人至今誦之是知以文章飾吏治其事功必大時之以
談詩古文詞爲官場之忌者舉不足信故因荔扉之行序
此以爲之祖蓋荔扉通人也其率此行以文章著事功此
但一考有成效矣至於三考釐工熙績以追鄉先輩王李
諸公風知老人之贈言不謬也乙卯首秋白石老人檀萃
序於滇院年七十一

金華山樵詩前集卷一

滇西 師 範 荔 扉

歲戊子

秋夜讀書幼學吟刪稿

夜靜百蟲歇河漢在西堂呼燈坐虛室披襟澤前芳始如
 治亂絲曲盡抽繹方纏縛一以去心刃飛寒芒繼如陟五
 岳巖險皆備嘗周視耳目變奇奧失所藏功匪恃記誦妙
 學關文章較彼漁獵者奚啻十倍強捲書起延佇微聞木
 樨香涼月亦驚上為予祭清光

讀史雜咏

禾黍蕭蕭九廟孤周原如掌入平蕪不知火照驪山日又
博褒妃一笑無

絃管嘔啞聽不真驪山西折瓦如鱗可憐三月咸陽火燒
盡深宮命薄人

灞水奔流入漢宮君王猶自懼隨風那知玉漏迢迢夜赤
鳳偷栖露井桐

青盧鏡殿事全非玉體橫陳月自肥輸盡江山猶請獵不
知誰殺晉陽圍

臺城花鳥盡含愁寶瑟珠簾黯黯收從此便無長夜飲寒
鴉飛上景陽樓

空聞棄艦倚江浮日日持杯醉不休狎客談諧妃子笑後
庭花落滿宮秋

天塹驚傳虜騎飛只同歡樂不同歸淒涼八角胭脂井艷
魄年年怨落暉

香風千里下揚州殿脚如花不解羞江水於今清似昔可
能長駕錦帆遊

幾度凭肩說勝遊六宮眉黛不知愁畱儂便是圖儂處誰

金華山想言前集
惜君王鏡裡頭

流螢飛盡夜漫漫夢裡尤悲玉樹寒
地下若逢休更問春
蘭秋菊一齊殘

己丑

春晚過李福生花隱園

十畝閑閑宅經春綠有痕
雨晴鳩喚婦鳩暖竹生孫
柳媚環橋水花迷抱郭村
興來輒相過隨月到柴門

酒間贈王青來

廿載青春客裡過對君豪飲爲君歌
夔門天斷猿聲苦

嶺風腥虎跡多世路崎嶇皆似此
好攜長劍臥烟蘿

蜀粵

聽笛

玉笛飛聲遠隨風自到來
故園情正切和露立蒼苔

雁字

健翮凌雲蘸夜涼雁門關外杳蒼蒼
烟痕消盡天如水寫
出秋聲賦一行

題畫雜詩

青山四面擁人家簫鼓聲中樹樹花
十里香塵騎馬路垂

楊陰護六橋斜

回首涼天爽氣饒
岳王墳畔雨瀟瀟
小樓一夜秋風起
臥聽西冷八月潮

白門柳色綠迢迢
春雨春烟殢板橋
茉莉香清人夢醒
玉闌干外聽吹簫

白蘋風散水花腥
葉葉歸帆夾岸停
江口潮平一回首
金焦兩點向人青

庚寅

踏春詞

人與花爭艷
匆匆趁夕曛
東風太無賴
吹起石榴裙

辛卯

龍尾關弔萬人塚

七萬人乃同日死
長平坑後復有此殘骸
山積棄不收
尚以捷書奏天子
憶昔轉戰洹河邊
白日慘淡含青烟
前軍失利後軍繼
赴敵安肯求瓦全
至今龍尾關外路
東塚西塚穴狐兔
靈旗夜夜翻
秋雲毅魄年年抱
春樹沒者且無悲
弔者休淚垂
馬革裝屍報其主
葬向沙場當怨誰
君不見陳陶澤中水
如茜
遂使都人盡
回面
良家十郡無一存

羣奴歸來血洗箭又不見金粟堆前土一坏寶釵鈿盒填
荒邱華清宮殿莽何處天陰月黑啼咿啾

題桃花扇

扇底花開別是春不隨凡卉落紅塵珠簾高捲江南月自
是當時齒冷人

燕子箋殘黨局更桃花三月雨空晴敬亭流落崑生死腸
斷秦淮玉笛聲

飛來寺小憩

趺坐禪房晚林陰淡酒顏心隨雲不住人與鶴同聞海色

蒼茫裡春愁浩淼問愧無腰上帶畱鎮水潺湲

青石灣

十五年前路重來一問津桃花將澗水款款送歸人

鍊鑪關

鍊鑪關外刺桐關雲白松青水一灣兩岸烟嵐濃欲滴遊
人馬上飽看山

壬辰

春思二絕句

紫薇山房刪稿

鴻歸應到海東頭爲寄離人一片愁春色最能牽別恨有

花時節怯登樓

燕語鶯啼總斷魂
簾波斜映賞花尊
小桃落盡無人掃
千里春風獨閉門

萬松寺題壁

得得扶筇到上方
莓苔滿院逼人涼
十年已是無僧住
猶有松聲撼夕陽

宿橋頭哨

夕陽橋畔匿落落
感孤征戍古烟常
斷秋高鴈自橫巖
懸雨勢磴道墮潮聲
縹緲今宵夢松風
逼枕清

望蕩山寺

妙香城外望林剎
遠紛紛一徑入寒雪
數峰藏白雲鴈鴻
秋未見鐘鼓夜深聞
何日脫塵鞅脩然鸞鶴羣

同簪崖白氏園看牡丹

花影人聲並一堂
草芽真覺有輝光
天風暖側芙蓉幘
露濃侵薜荔裝紅粉
也應憐我瘦夢魂
猶自爲君香謫僊
去後誰知已零落
清平舊樂章

秋懷二首

簪崖出示秋懷詩
有懷人夢斷蒼葭浦
弄月霜高

白馬天之句因次其韵

四壁空聞唧唧聲，曾無一事萬緣平。
愛看山色常欹枕，恐負秋光懶入城。
砧杵音多風漸緊，芰荷香暗露猶輕。
無端舊恨勞棖觸，壁月瓊枝四載情。

鎮日齋頭壓被眠，夢回簷雨滴涓涓。
濕螢兩點月窺戶，孤鴈一聲霜滿天。
事去渾如離澗水，愁來真似繞林烟。
多情自足爲人累，若使全拋更可憐。

彌川八景和楊冠山先生韵

東谷梨花

半帶朝烟半夕曛，花村人靜碧氤氳。
東風一夜吹成雪，冷浸溪頭十畝雲。

西河烟柳

天渡橋頭烟柳青，天渡橋下水泠泠。
水如襟抱柳如態，時與春山爭娉婷。

南鄉溫泉

飛玉欵珠水一塘，雪天親試煖如湯。
靈泉詎有趨炎意，流與人間洗冷腸。

北刹曉鐘

雲護花宮十二重
天明寺寺響疎鐘
東風不肯輕相送
城裏居人睡正濃

天橋挂月

澗水琮琤夕照幽
石礪如月跨中流
巨靈掌與吳剛斧
迤作青天半壁秋

鍊鎖飛虹

江飛急峽鳥驚回
客路全憑釀鍊開
疑是渴虹雲外落
晴天風雨破空來

石碕花鯉

爭爽寒溪古碕深
神魚五色半浮沉
龍門未必如天遠
對雨能增浩蕩心

梅村晚荷

路遠城西十里餘
圓荷的的媚晴虛
莫言晚出風差減
點染秋光却讓渠

癸巳

送硯北回城

茗椀烟筒樂事饒
閒庭日日譜風騷
杏花天暖朝沽酒
明月樓深夜聽簫
登榻論交裘馬賤
空山臥病友朋遙
可堪

又作經旬別手掉吟鞭上石橋

北邙行

風高寒食紙錢飄斷碣零星世代遙
烏嘯荒原人散盡白楊陰雨夜蕭蕭

杜鵑花發杜鵑啼紅滿千山綠乍迷
黃土一坏齊下淚野風吹雨過橋西

春燕次簪崖韻

春烟寒帶柳綿飄雙剪玲瓏迭放嬌
曉日亭臺人寂寂落花門巷雨瀟瀟
窗分絮語愁初破簾捲輕陰路不遙
白項

鷓肥新試羽銜泥飛上赤欄橋

同社中爭作艷體戲倣之得春遊二律

二龍橋畔太匆匆一路香塵印落紅
雲化尊前疑作雨雪迴掌上不禁風
春生細柳天桃外在輕陰暮靄中
亞字欄干丁字院半床明月夢惺忪

蘆麥青浮雨一犁萬家烟火碧雲西
柳垂孤嶼鷺初下花落短牆鶯亂啼
象板紅牙春社晚衣香人影畫橋低
夕陽無限勾畱意回首高樓眼欲迷

夏夜

窗虛夏亦寒四壁蟲吟切中酒略成眠夢回疎雨歇

聽琵琶

半簾殘燭月昏黃風攪疎林夜未央鏡板銅絃金石碎新聲彈出小秦王

立秋後答城中諸友人

大有烟霞媚隱淪不朝不帝自由身風驅暑去如殘寇雨約秋來似故人詩潑戲題花姊妹病餘閒課藥君臣漆園夢裏翩翩蝶時向藜床結淨因

門掩楸梧午氣涼酒經注罷倚斜廊河流竟日常驚座
色終朝不下墻深巷雨滋苔蘚綠小池烟雜芰荷香那能更向紅塵去浪籍蘿衣與荔裳

題簪崖畫

暮山青欲無下有幽人住門對碧天秋輕帆自來去

秋日寄硯北

記得高樓載酒從詩狂每欲剪吳淞言驚座上陳同甫人比橋西陸士龍零露半窗啼絡緯秋風一檻落芙蓉思君今在雲深處獨聽青山夢後鐘

七夕集簪崖書屋送龍湖之楚

秋歷雨聲寒蕭蕭天欲暮惆悵對雙星鵲橋渺何處須臾
霽色開斜月耿殘霧銀河靜不流香滋桂花露座有遠行
人作吏郢中去郢中山水佳勿負山水趣銜杯話深宵高
言發情素鄰雞紛亂啼日照庭前樹

秋柳四首 有序

元才子蕭寺聞鶯曉烟殘月韓舍人章臺繫馬翠
袖紅裙夫何綉閣微歔啼痕露浥畫樓低亞情淚
潮翻簾前青眼慵開鏡裡蛾眉頓瘦玉簫金管都
感枕上繁華南鴈西烏時作愁中伴侶盼纖腰之

一捻披離緒以千絲葉葉生涼腸斷西風院落枝
枝怨別心驚殘照樓臺嗟乎往事疑雲流光似水
樹猶如此人實何堪每惆悵于當年後低徊於近
日永豐坊內恐無握手之期長笛聲中半屬消魂
之曲益詩裁四律非敢效歷下之顰而體繼七言
聊以發豪端之恨云爾

灞橋西去路漫漫別有離人忍淚看夜月弓刀青塞遠秋
風簾幕翠樓寒淒涼鴈影霜初落憔悴蛩聲雨又殘回首
昔年會折處不勝清怨倚闌干

芙蓉開盡渚蓮枯，冷落徐熙六幅圖。對此蕭騷時顧影，可堪清減亦如吾。鶯秋氣短桓司馬，送遠魂消楚大夫。鴉噪白堤歌舞歇，冷泉聲裡賦西湖。
白馬金羈去未還，脩眉綠損一彎彎。蕭條古驛明殘照，零落疎籬露遠山。吹笛客迷青雀舫，按歌人老玉門關。珠樓寂寞銀墻冷，不是當年謝阿蠻。
碧天無際晚鴻聲，落葉蕭蕭夾岸平。八月關河遊子夢，十年漂泊美人情。釵鈿夢冷紅泥閣，砧杵風高白帝城。何日承豐坊下酒，畫簾低捲聽啼鶯。

秋日遊天生礪是夜卽宿東石壁

一徑縈紆盤絕頂，長松怪石共招邀。插天並峙東西壁，跨澗雙通上下橋。深谷雲流秋瑟瑟，空山葉落樹蕭蕭。明朝再挈登高酒，飛札城南報兩樵。
蘇香然 彭南樵
溪聲窸坎松聲碎，豹咳如人夜已遙。虛室燈青出饑鼠，陰崖風急下飛鴞。卽無勝具終思濟，詎有凡心未盡消。試向地爐尋活火，生柴斫帶白雲燒。

友人招同楊芝宇前輩暨硯北南池蘭臯簪崖小集
塔山別院分韻得上字

樓中秋氣深樓外秋光漾孤塔背殘陽晴天森翠嶂山痕
淡欲無林影紛相向一步一徘徊醉歸新月上

過錦石村

田間處處足禾麻流水聲中一兩家繞屋疎籬香不斷晚
風開遍密蒙花

過硯北書屋次其見懷之作并呈南池

寂寞詩筒復酒筒尋梅時過小橋東別離情似初生月聚
散人如不定風地僻有山堪種樹心閒無事可書空相逢
又是冬垂盡坐倚斜闌數塞鴻

同簪崖過友人樓中出紙索句各題七律得圍字

消閒偶過文人宅山擁高樓碧四圍墟市日斜人影亂水
田春動豆苗肥蕭蕭野色當窗出裊裊茶烟繞座飛正好
題詩陪謝五梅花香裡憺忘歸

城南

回首城南路清溪夾小橋田園富菘韭庭院足芭蕉夜月
梅花瘦春風燕子嬌相思如積雪向旭始能消

宿山村

瘦馬青衫落葉村家家籬外有雞豚花開似雪時當路山

全華山詩前集
拱如人恰對門地雜白夷言語澁居臨空谷友朋尊浮梁
酒好頻相勸醉畫松窗記月痕

甲午

寄洪西堂趙所園

課餘集刪稿

樓外雲多望欲迷一天烟草綠萋萋夢餘雪霽船窗暖湖
畔花開酒幔低南浦春波人乍別空山落日鳥頻啼所園
幸調西堂筆不盡相思十八溪

題李萼園暢觀亭別業

晴雪疎籬外園林久擅場半軒來爽氣一室貯清光流水
曲穿徑遠山高過墻朝朝花下酒醉坐落梅香

同硯北南池葦塘蘭阜簪崖蔗村遊天生橋賦得桃
花帶雨濃分水字

去年九月攜酒來醉臥橋頭枕流水石氣青逼霜天高寒
林秋老紅欲死此日重遊正春風萬樹桃花弄烟蓋霏霏
細雨生溪灣疑笑疑顰嬌自倚花光人面兩依稀日麗丹
崖顏色美歸路迢遙西復東碎錦迷離漾清泚

病中

碧草清波外春愁我舊諳懷人勞遠夢臥病惜餘酣身似

當風絮心如上箔蠶板橋花月曉重譜望江南

新柳次韵

輕黃渺渺認前村新絮新絲總斷魂楚岸香多憐髮影吳
天夢遠憶啼痕日斜橫映紅泥閣烟重微分白板門蹴地
長條都折盡春風又欲送王孫

山齋夜坐

烟含竹屋春燈靜月霽山堂晚磬孤坐倚迴廊聽流水等
閒消却睡工夫

元宵日抵榆城

斜風細雨上榆門瘦馬凌兢日又昏白石橋通芳草渡紅
泥閣隱杏花村月逢元夜精神滿人入新年笑語溫燈火
滿城春似海陣香蒸粉慣消魂

榆城旅興

青門以外卽天涯細草香停白鼻騮三月客愁多似水七
年寒食總離家紛紛任折橋頭柳緩緩客看陌上花黃到
薔薇紅芍藥一聲啼鳥日西斜

園居有感

細雨不成滴春生花樹枝濛濛難自己寂寂苦相思造物

心原幻佳人數亦奇閉門攝羣想雲散月來遲

寄納谿大尹石丹崖先生四首

亂山如黛鬱嵯峨凍雪流雲水不波殘月五津鳴塞鴈高
窗一夜落秋河棧烟驛雨馳驅苦竿馬旄牛畜牧多十里
西風撫琴渡推蓬時復聽渝歌

平羌江繞路盤盤作宰休言蜀道難細雨船歸魚腹浦清
宵星落虎鬚灘鶻啼劍閣春前急秋擁我眉雪裡寒鈔絕
西南山水縣荔枝香裡日憑欄

跌蕩關山挾酒行高臺懷古獨含情驚濤怒石黃陵廟落
葉寒鴉白帝城官閣琴彈秋月曉訟庭花墮午風輕相思
心似飛來塔夜夜清溪照影明

新詩題滿薛濤箋坐理風花蜀國絃五袴歌傳循吏美一
錢人頌使君賢時乘黃茂樓邊月去聽丁東院裏泉醉酌
郛筒春正曉也應喚作海棠顛

遊水目山

峻嶺重重合風吹霧滿身幽林時見鹿僻徑不逢人鐘落
諸天靜花開上界春到門知有寺山犬吠猿狖
到此消炎暑寒森萬壑水深山無躁客獨夜有歸僧老樹

盤危磴閒門絡古藤忽聞鐘磬響紅上一山燈

寄洪西堂

森森春愁未有涯
墮紅如雨濕窗紗
故人舊似休文瘦
莫倚閒情咏落花

香城風定柳條疎
三月將闌四月初
洱海飛濤蒼嶺雪
三捲簾終日坐清虛

爲蘇遠舟題石

謹於西岳頂割此碧芙蓉
蟠屈萬千狀縱橫三五峰
翠森虛壘冷青映曲池濃
雷雨宵來急凌空走怒龍

七夕嘲織女

乞巧真能得巧無
年年瓜果祀黃姑
渠家自有相思苦不
織迴文錦字圖

戲代織女解嘲

紫微烟散白榆風
星幃雲輶度碧空
天上一宵成一歲笑
他人世太匆匆

隴頭吟

十年邊上將不復計生還
逐北浮青海防秋戍黑山
肉陵取箭羽血雨濯刀鏃
所向無前敵聞聲走百蠻

百戰人將老交河日夜流燒痕迷野望兵氣鬱邊愁虎射
南山晚鷹呼大澤秋同時諸部曲一半已封侯
萬里黃雲合移營下大荒鍊衣冬禦霰老馬夜盤霜淚入
雙笳冷愁隨一劍長蹉跎鬢毛禿悔作羽林郎
奇績天垂聽承恩此入朝笑舒猿背捷醉埒虎鬚驕裘帶
軍中靜烟塵閫外消戟門麾蓋出不數漢嫖姚

北上日留別硯北簪崖

北征小草刪稿

此別易經年蕭蕭葉滿天彩雲隨客夢明月照離筵每愧
劉蕡策空持祖逖鞭黃金臺畔路回首更生憐

抵昆明

金馬山前落葉時碧雞關外雨如絲一年強半鞍頭坐又
向天涯賦別離

楊林驛謁蘭止菴墓

處士星長晦空悲宿草陳荒阡餘道氣勝國有詩人雪照
寒林曉花明古驛春更聞東隴宅零落共荆榛

賈東晦亦
楊林人

武侯祠

漢業空塵土先生尙有祠殘碑苔蘚蝕畫壁鬼神歆遺恨
三分鼎關心五月師至今風雨夜猶似擁征旗

石虬亭題壁

亭爲滇黔交界

滿天風雪擁關來
繫馬旗亭首重回
一語勸君須盡醉
清尊猶向故鄉開

鬻琴碑

凍雨滿天客行役
通天驛路苦逼仄
不磨鬻琴一碑石
鬻琴之人宰平彝
彈琴理民歸無貲
囊止一琴仍鬻之
鬻琴到今經幾秋
琴音已歇琴心畱
高山流水風颼颼

大山凹

一徑入蘿陰
炊烟半明滅
蕭蕭斑竹枝
臨風墮殘雪

白沙關

萬壑千山裏
盤旋鳥道橫
殘冰畱虎跡
飛瀑亂猿聲
地阨雄關險
巖臨古木傾
穿泥行折坂
雲氣袖中生

半坡塘偶題

轉盡危坡見酒家
茅簷小憩日西斜
青山碧澗無窮態
映出壚頭兩鬢花

坡貢喜晴

十日黔西雨
蹒跚怯路難
晚晴天乍見
春動日猶寒
雲樹依山仄
空箱通歲闌
應知北堂上
時慮客衣單

乙未

阿江塘

十畝山田水一方
剪茅爲屋石堆墻
蒼茫古道無人迹
野竹蕭蕭亞雪黃

新正初三日抵貴筑

一徑通滇楚疑從釜底行
山開羅刹國雪壓夜郎城
漫滅唐蒙跡蕭條盛覽名
衣冠紛拜跪容易旅情生

牟珠洞

踢破媧皇鼎淋漓直到今
山深晴有霧洞古畫常陰
雲護千花塔天垂七寶林
碧潭風雨暗時聽老龍吟

飛雲崖

雲去雲來兩不疑
半崖寒綠黯離披
依稀似聽山靈語
持贈何堪祇自怡

黔中

竹王祠廢草蕭蕭
潏蕩關河去路遙
積雨寒侵天似甕
亂山青湧石如潮
生苗伏莽黃昏嘯
臥虎窺人白晝嬌
容易書生騎瘦馬
江花開日過偏橋

元夜舟泊玉屏懷硯北

金華山志詩前集
扁舟江上逢元夜涼雨天涯憶故人惆悵去年蒼汨路試
燈風急柳含春

高流洞

險絕高流洞驚風吼急湍石橫鰲背黑濤散雪花寒山勢
迷溟楚江波合芷蘭生平仗忠信未覺路行難

舟中曉望

大鷓鴣接小鷓鴣雨霽殘更放溜遲忽地春濤催夢破江
花江草正離離

芷江縣

半倚修崖半帶洲人家時逐水沉浮沅陵無限如烟草才
過東風綠滿樓

望辰谿縣

石鎖孤城一綫通柔烟消盡水濛濛四圍山色日初下冬
少樓臺空翠中

舟中聞笛

遠山如黛水如羅畫舫中流次第過無限春愁齊觸起滿
瀟殘笛雨聲多

清浪灘

空江十日眠烟濤寒雲晶晶風騷騷
茲晨犯險走清浪船頭直落船尾高
盤渦如磨杵難測青天欲斷石逼仄腥風
怪雨捲蓬來龍涎半白蛟涎黑行人相對皆失聲舟子逞
力身命輕世路艱難亦如此波瀾到底終須平伏波祠廟
空中起千古人猶說漢壘跼跼飛鳶不復悲社鼓神經哀
老子

過明月菴

孤棹隨流轉匆匆日易曛寺從危嶼見山逐五溪分石氣
含殘雨鐘聲下白雲無由醉明月相對似離羣

將至桃源有作

別是江湖浩蕩情暮雲無際感長征兼天樹色隨帆轉
夾岸山光逼眼清春水懷人汀草發孤舟坐雨夜潮生明朝
試訪桃源路手啟蓬窗數落英

舟過桃源

扁舟江上來目涉便成趣芳草綠盈浦雜花紅滿樹不見
避秦人靄靄春烟霧

舟中卽目

午粧才罷便凭闌雨霽高樓漾薄寒花氣撲簾春不管匆

金華山集
三
夕人影鏡中看

虎渡口望荊州

重鎮雄南服蒼茫四望寬暮雲春樹短落日大江寒戰伐
悲陳跡風流足浩歎龍山山畔路斷石白漫漫
斷岸臨江險橫流大扁過千秋限南北萬里下岷峨草長
芳洲綠春消霽雪多無端今古事淼淼悵層波

荊門州訪蒙惠泉

黑月小池涼林陰漾清泚忽聞人語聲栖鴉亂驚起

峴山

峴首山前路殘陽映堞紅登臨仍我輩花鳥正春風沔漢
流何極襄樊恨未窮輕裘成往事悵望古祠東

次襄陽

聽盡銅鞮唱高樓日已昏烟雲襄野闊江漢禹功尊欲訪
名賢里偏消旅客魂明朝竟東去匹馬向夷門

渡漢水望文選樓

昔賢讀書處高挹楚天秋人物堪千古江山此一樓殘霞
明古渡落日滿輕舟腸斷王孫草萋萋綠未休

新柳次高羽豐前輩韻

滴滴翠堪憐村邊復水邊影踈眉際月香濕鏡中烟客路
仍千里春風又一年雨餘絲更密魂斷早涼天

過新野

已入中州道春寒昨夜增鴉啼千樹雪馬渡一河水芳草
迷秦望荒烟沒漢陵側身試懷古愁絕遣誰能

臥龍岡謁諸葛武侯祠

若作終身臥誰憐抱膝吟艱難出師表慘淡託孤心王業
開三顧天威壯七擒定軍山畔碣同此淚沾襟
不失荊州地難將鼎足分關張竟無命權操豈能軍陣偃

祁山月戈橫劍閣雲劇憐星落後仗國論頻聞

孺子非難輔炎炎運忽終才華三代少忠孝一家同細雨
青泥坂寒烟白帝宮若將成敗論天亦妬英雄

爲拜先生像回車問草堂地猶隣白水龍自臥南陽古木
經冬翠晴花拂几香英風兼靜氣長此薄空蒼

長沮桀溺耦耕處

悵望千秋上斯人亦可欽耦耕傳此地避世有同心野水
茫茫白春烟漠漠深停車賦招隱落日澹遙岑

舊藥縣

野烟無際晚蕪平懷古行過古葉城縱有真龍誰解好子
高獨負好龍名

次潁橋

斷磧通平野春深綠未齊暮雲江北鴈殘月汝南雞巢許
風斯古荀陳迹已迷清川明日路疲馬聽鶯啼

新鄭縣

斜陽水亂流勢欲浮高閣不見秉簡人春風吹芍藥

過淇縣

一鞭風雪入朝歌淇水經春綠始波不見當年萬竿竹蕭

蕭村舍野棠多

宜溝驛

黃雀溝南春草深黃雀溝北碧雲陰碧雲春草一千里溝
水時流離別心

鄴中

鄴下風流久擅場歇鞍閒望古臨漳美人詞客皆黃土剩
水殘山半夕陽白羽雀飛春寂寂青頭雞唱夜茫茫此身
已愧因詩瘦懷古何禁黯自傷

次邯鄲

路入叢臺草木嬌東風庭院日迢迢濕雲濃護才人宅流
水寒嘶國士橋鄉井至今除七首女兒空自愛纖腰此間
舊是消魂地抱得魂來沒箇消

督亢陂

寒風吹易水白日照孤城磊落衝冠氣淒涼變徵聲藥囊
徒有恨錦柱太無情轉惜于期首空隨督亢行

過蘆溝橋

石虹橫臥小黃河不斷車聲柳外過路入 皇都春更好
綠烟盡處五雲多

長安遊俠詞

鞞鷹脫背陣雲高玉爪拏空洒血毛盤馬白狼河上望霜
風吹裂綉紅袍
綠草烟飛射雉場黃金勒映紫絲韁歸來賭酒長安市又
醉佳人錦瑟旁

永平道中次南池韻

觀海集刪稿

漠漠黃雲帶野平朔風吹送晚鴉聲石橋沙磧空春水落
日寒烟見古城山接九邊青不斷柳當三月翠初生卽今
海宇無征戰漏永嚴關角自鳴

同人還滇爲予索詩立賦一絕

尊酒纔乾燭又斜
易教離思滿天涯
故園歸去秋光好
笑對南山采菊花

送別彭南池袁葦塘還里

帝里春初暮花飛
驛路紅相逢俱草草
此別太匆匆天地
容耽酒江湖嘆轉蓬
臨歧無淚墮揮手夕陽中

送別楊栗亭還榆

歸去蒼山臥白雲
相看惟有淚紛紛
都門四月春如水
落盡桃花又送君

玉田曉發

作絮垂楊纔似雪
如絲小雨不成珠
青山一角雲千點
寫出詩人曉發圖

夏夜聽雨

芰荷池館芭蕉院
葉葉關情酒半醒
舊夢已隨新雨散
亂蛩聲擁一燈青

望海

到海方知水茫茫
一氣平潮來箕子
國客上伯夷城未雨
愁鯤運先秋感鴈聲
故鄉真萬里回望獨含情

立秋後一日作

暑雨連宵積濛濛不肯休價低魚易買味薄酒難求貼屋
炊烟重當門野水流鴈聲楊葉裏又是一年秋

閒庭

燈火閒庭晚悠悠望欲迷疎星當戶動斜漢壓簷低鴈落
榆關北秋高渤海西蛩聲聽自苦况向枕前啼

不寐

挑燈獨坐含情狠藉茶鏝藥鏝細雨梧桐點點西風砧杵
聲聲砌蛩聒濕能怨匣劍驚秋自鳴一枕天涯倦客縱教
有夢難成

午窗遣興

一枕涼生雨過初書長全賴睡消除窗迎落葉秋來早門
掩寒苔客到疎蛆爽滿浮千日酒斗軒斜受半床書科頭
赤脚無拘束只恐山僧未得如

秋夜

寥廓荒場遠市城鵬雲渺渺蚌沙平天圍大漠山無色雁
落榆關月有聲鄉樹夢迴人萬里客窗鐘定夜三更思家
憶舊情何限斜倚寒燈坐到明

夜步

一庭明月光肯爲幽人住坐起獨徘徊蟬聲咽清露

中秋

故鄉渺難望秋思自紛紛萬里此明月青天無片雲晚蟬
烟外響疎笛夜深聞坐見盧龍塞西風起鴈羣

渡灤河有懷彭南池

八月盧龍道蕭蕭髮欲斑秋風渡灤水落日滿榆關寒信
霜前鴈鄉心夢裏山不知竹林子匹馬幾時還

開平道中

秫籬低護老農家十里西風酒旆斜秋水夕陽山數點石
橋疎柳路三叉黃登歲晚千倉粟綠長霜前一架瓜最是
授衣人事蚤牽裙披社采棉花

曉發戴家河

瓜棗田園路欲迷秋風吹鬢馬頭西水荳花映碧潭曉無
數野禽烟外啼

薊州道咏秋柳次壁間韵

西風憔悴杜韋娘砧杵聲中盼夕陽落盡寒鴉飛盡鴈蕭
蕭邊馬蕭門霜

客思

美人何處碧雲合遊子不歸秋草淒記得去年臨別處海
棠花底鷓鴣啼

贈劍

相隨今十載日日引杯看歲晚風聲急天高月色寒恩仇
非所快埋沒亦終難不見旄頭指霜刀血未乾

時王師方討金川

過訪南園太史卽以畱贈

名園霜落樹交枝造次登堂酒不辭萬里湖山閒話舊一
牀風雨細論詩青篔未許耕隴麓

時欲假歸未允

彩筆惟應賦鳳

池太息十年相見晚祇今猶似夢中思

送唐儀廷如粵

薊北寒生九月天分襟猶作對床眠匆匆一夜燈前話明
日相思倍可憐

不將書劍負生平短褐依人萬里行容易春風畱客醉素
馨花繞尉佗城

將歸永平別南園太史

別程東指海雲涼贈我新詩意慨慷百斛酒殘燕市月五
更衣濕薊門霜來當徑菊英初紫去值江橙實就黃歲序

驚心如轉電匆匆又是小桃芳

南園送予有句故黃鸝云相期在桃花

東歸畱別饒漫塘谷西阿梁九山孫嘉樹繆申浦諸

太史

匝月論文伴玉堂羣公虛譽我何當無端又唱陽關曲落葉聲多鴈報霜

盧龍塞口路漫漫作意邊風掠面寒別有天涯知己夢夜深隨月滿長安

旅興二首

一春踪跡感飄蓬醉坐湘烟楚水中峽雨晴迷神女暮江

風晝對大王雄辰沉草暗侵脣綠襄漢花開映肉紅唱到

銅鞮天易曉細腰宮畔月朦朧

蕭然一室奈愁何叉手高吟拍手歌夢繞梅花鄉路遠春

生竹葉酒懷多夕陽寒雨人初別明月晴江鴈又過試自

拂雲堆上望暖風吹雪欲成波

丙申

聞鴈

秦皇島接漢皇臺春草如霜綠未回何事南飛雲裏鴈不
論長夜競歸來

花朝

塞門回首路漫漫得意春從夢裏看老記天橋橋畔寺馬
頭晴雪一杖寒

春夜

萬里天涯路茫茫隔大刀地涵滄海濶風扶塞雲高情夢
經春永清吟入夜勞不須怨離別多事是青袍

寄黎松臯卽諷其歸閩

十年書劍海西遊地近榆關易白頭羨殺臥龍巖畔路青
蚨沽酒謝公樓

自笑

自笑年來與病宜非關中酒起常遲匆匆又過湔裙節才
爲桃花了一詩

柳絮

碧水紅橋綠漸平相思樹底越禽鳴回頭瞥見花如雪二
載春風客裏情

三分春色二分塵點點飛花滾地頻斜日五陵原上路多
情只管送行人

惹空新絮欲成綿處處春光媚遠天謝女簾櫳風乍起薄

粘紅袖夕陽前

晴絮當風不耐飛永豐坊外綠雲肥憑鶯說與春光道暫
住些時且莫歸

飄飄恰恰復盈盈一種悠揚萬種情芳草微波相映綠莫
教容易化浮萍

曾向天涯賦別離一年一度一相思河橋日暮花飛急恐
有情人折過枝

老米溝觀海

未識方輿壯今來問谷王一泓殊渺渺四顧總茫茫島路

通諸國濤聲薄大荒故鄉歸臥後把酒話東洋

雨後晚步

羣蛙閣閣水瀾瀾塞上征人鬢欲斑生受夕陽新雨地青

山雨點兒檢關

題葛砥齋詩集後

曉風殘月不禁多

砥齋小詞頗有作者風

一曲清詞艷綺羅幾向重

闌燈炮後紅兒按拍雪兒歌

意中人去已經時猶自多情八愛詩

集中有八愛詩

應識如花張

好好背花低唱惱儂詞

題較獵圖

誰寫龍城較獵圖
紅顏日日醉駝酥
臂上蒼鷹腰上箭
朔風吹透錦襜褕

彎弓走馬疾如飛
秋老天山草不肥
才奉蠕蠕公主令
骨都營外射鵬歸

安君招飲池中荷花盛開題四絕句

映日流雲朵朵濃
碧波香沁水芙蓉
夢回迷却橫塘路
十丈花移玉女峰

紅蓮香勝白蓮香
柄柄修莖送夕涼
明月一池天在水
魂

消三十六鴛鴦

萍蓬十載溷風塵
縱有林泉未許親
荷芰作衣蘭作佩
賞花多半是閒人

新霽池塘拂翠筠
蓬萊只在海東頭
當軒自摘荷花瓣
駕作輕舟海上浮

酒間口占

青州從事麴先生
渴眼相看盡有情
我醉慎無多酌我
十年來負酒狂名

七夕

金華山志前集
盈盈窗際月遙挂碧雲端野濶河流轉天空鵲影寒雙星
今夕會萬里一人看耐可香閨側含情倚畫欄

寄答簪崖

夜涼清露滴疎砧擁鼻誰憐塞上吟七尺不隨人俛仰一
杯甘與世浮沉夢回遠笛秋風早酒醒斜廊落葉深同此
如鈎簾畔月天涯各自照愁心

寄懷硯北

塞天風急感萍蓬夜夜懷人月正中才退始知詩作累秋
深漸覺酒無功拳山勺水都成癖大布麤繒足御窮回首

長安裘馬地時將雙袂障西風

趨庭兩載向龍沙每到秋來便憶家昆水漲消魚正美螺
山露冷桂初花曉風殘月柳三變茅店板橋温八义料得
晴窗淋醉墨硬黃新濕字如鴉

過靈澤寺

略約橋西路閒來禮梵王始知開士宅半屬老農場秫穗
出簷紫瓜花當院黃寒鴉飛不定繞屋噪斜陽

中秋念故鄉諸友

秋與人俱老蕭蕭獨倚闌如何今夜月只在異鄉看桂露

金華山詩音集
沾衣濕梧風惹鬢寒桑乾原不近况已過桑乾
月色無今古相看處處同江山此清夜天地一冥鴻潮落
三津白雲消九野空苴蘭城畔酒誰與話飄蓬

安君時東見貽文魚爲賦長句四律酌之
十年人老釣絲風又數游魚下碧空吹浪影翻三寸白
浪花散一羣紅盆池自有豪梁趣勺水能成變化功試向
窗前閒洗硯錦鱗飛起墨雲中

胡不乘濤或在淵朱華點點最堪憐曾從碧藻紅蕖裏
向雜窗鶴徑邊聽瑟夜浮缸面靜避人朝沒浪痕圓何須
更羨橫江樂眼底春生一鏡天

身世從今可靜觀湖天秋躍彩鱗寒水如白地光明錦缸
比圓瑩赤玉盤雲動尚思湖海濶波平頓覺斗升寬通津
處處皆漁網未必能容一日安

日日相看酒易醒生魚鮓入草元亭徒吟乞鶴司空句恨
乏籠鵝內史經水剪吳江三尺綠天浮遠塞一缸青宵來
不許夢騰睡恐有驚鵬止北溟

石城樂

莫愁湖上莫愁村楊柳遮墻水到門一曲清歌不知夜鬱

金裙浣酒成痕

楊柳樹

楊柳樹低映門前路
門前去路渺無涯
春歸卽是春來處
匆匆節物幾時更
病客驚心雙淚傾
才見風枝牽紫燕
又聞露葉語流鶯
風枝露葉矜春好
年年作意垂官道
已蒙青帝護持多
未怕行人攀折早
枝如腰娉婷
妬殺楚宮嬌
青天樓閣紅欄院
碧水笙歌白板橋
葉如眉長短
澌澌盡入時
却月不妨宮裏妬
遣山憑向鏡中窺
豈知零落還無
半半拂陂池
半塵土關河八月已秋高
縱是歡場亦愁苦

楊葉復楊枝
條條空復垂
誰結楊柳帶
誰牽楊柳絲
登山臨水傷離別
風流轉盼成銷歇
遠笛猶吹紫塞雲
栖鳥空叫盧龍月
月意雲情倍悄然
數行殘影尚娟娟
淒迷對汝搔蓬鬢
何似相逢寒食前

偶過靈澤寺

忽有尋幽興
行行策短筇
人來秋色裏
寺在夕陽中
野水含情綠
孤花着意紅
到門僧不見
庭草自西風

晚眺

關塞秋生萬木風
夕陽影裏曳飛鴻
長安自遠看難見
不

管浮雲可蔽空

九日歸自安君處天忽陰雨命酒復醉

歸來落葉擁斜廊風雨無端攪醉鄉且更對花持一盞人
生誰過百重陽

塞門秋興

蒼莽令支縣趨庭歲序駸雨收秋夜熱雲散海天陰白髮

趨王事

時家君辦公赴都

青袍肆野吟回瞻星共處烟月鳳城深

鬱鬱興龍地羣山直接燕寒城秋角繞紫塞夕陽懸海暗

朝鮮國關通樂浪天不須論形勝三老太平年

元菟城邊角淒淒滿戍樓白龍堆畔柳隱隱辨營州砧杵

千村夜關山一笛秋時和無曠土灤水任西流

王氣消兵氣衣冠達上都黃雲終古合青草半秋枯乍落

盤臯隼時啼繞樹烏夜深搔首坐鄉思莽縈紆

更有誰相對宵殘感倍增蛩悲清夜月蛾戀瑣窗燈酒德

延中聖詩神悅上乘遙知小兒女風雨雨憶行滕

迢遞南來信誰言僅萬金三年遊子跡終日倚閭心水落

昆江淺雲屯大澤深寒衣遠難倚愁聽隔鄰砧

丈夫軀七尺竟不入承明本切懷居戒時深望古情人憐

騏驥骨士有鳳凰鳴忍臥閒中月悠悠負此生

近塞秋偏緊驚風徹九邊長城何代窟滄海古時田木落

呼鷹地霜清射虎天床頭孤劍在銛鏑儘堪憐

寄南園太史并呈硯北南池簪崖時南園亦客彌渡

寒尊惜別語頻頻回首俱為隔歲人遲我不來君又去桃

花空憶帝城春

南園送予有句云相期在桃花

亮節清才背俗流一竿還赴海波秋飄零故宅隨風雨

南園

宅於去年六月

中盡没于水誰與重開白雪樓

酒醒天涯一雁橫鄉愁日逐海雲生萍蓬踪跡誰應定林

葉蕭蕭且作聲

眼底蘇

硯北彭池南

盡可人簪崖瀟洒任天真花開約向虹橋

路濯足傳觴醉老春

采棉詞

北坨花發接南坨手拾晴雲片片多最是邊城好光景憑

誰演作采棉歌

采采筐盈大道旁輕於柳絮白於霜人情半似秋胡薄只

采棉花莫采桑

采棉著布為郎裳薄薄鋪勻密密行不信人家金屋裏錦

金華山詩前集
裘雙襲尚言涼

八月秋高風露晞采棉才罷
寒機今年花比去年好添
製新衣補舊衣

樂亭前竹枝詞

歡似昌黎五峰色一峰一色
儘人憐生憎十日風和雨知
隔峰晴何處邊

海水不隨河水淡男兒終欠
女兒癡北去白翎南去雁心
情各各未相知

明朝又是龍擡頭正好停針
陌上遊不學年時金鈎
歡贏却紫金鈎

毳鋪煖炕起閒談滄酒如油
莫厭酣枕大磨菰拳大杏無
多風味抵江南

桃花風裏上京都送別親溫
酒一壺拾倒東錢三百串倩
歡消去買珍珠

妾心如石青難磨妾貌如花
春易過只恐歡如走烟炕些
時熱上亦無多

樂亭後竹枝詞

歡似灤河妾清河兩河無日
不通波涓涓滴滴同歸海迸

作春潮上月坵

三皇廟前春麥青
三皇廟後柳冥冥
打扇歸來瞥相見
對歡先頌藥王靈

一窗明月照秋機
搗罷清砧活計稀
不道今年寒更早
重陽才過就添衣

相公橋下水迷濛
相公橋上秋葉紅
怪絕沙頭一雙鴈
年只在道途中

曉起

吹折數枝花
莓苔依舊綠
夜來風雨聲
勢欲捲茅屋

聞砧

院落遠沉沉
秋風激暮砧
美人力應倦
羈客感何深
夢破異鄉月
寒生遙夜心
關山千萬里
空外若聞音

見柳

絲絲碧柳映閒門
微辨眉痕與淚痕
一種輕黃烟際色
春風秋月各消魂

獨坐瀉杯亭
風雨中淒然
有懷共得絕句四首
寄硯北簪崖

碧天回望故人遙
赤水江高不上潮
惟有別時今尚記
一

鞭斜日二龍橋

閒居正傍漢皇臺秋盡黃雲黯不開白草平原風雪路誰

同騎馬射鵬來

姑射仙人冰雪肌比來人世見應稀聞騎龍戲青冥裏手

剪雲霞作袂衣

開硯北近
撰傳奇

簾金半盡為屠龍且復藏刀未試鋒脫手新詩霞片片絕

勝清水出芙蓉

簪崖適
寄近集

秋日禱詩

球球無長策誰云處士尊陳雲生遠渚落葉擁閉門浩蕩

人間世蕭條海上村舊詩新復改持向菊花論

平定金川恭紀

有序

皇上御極三十有六年兩金川不庭

命將出師

指授方略粵五載丙申元克期得蕩掃狼穴列為鎮戍

黃遂行東巡禮祀岱宗謁

孔林四月廿八日駐

蹕良鄉郊勞遣帥各進爵有差維時緬會降表亦隨至

臣伏見比歲以來哈密伊犁巴里坤烏魯木齊以次

全唐詩集
卷一
三
釐定拓地二萬餘里輿圖之盛遠過今古史志所傳
聞謹撰七言近體詩六章昭示千載其詞曰

雪欄江畔路茫茫鼙鼓寒驚萬馬霜耀德總期

黃鉞靜稱兵難宥白蠻狂五年轉粟通巴子三道分軍
出夜郎淨掃西南諸部落聞風已自走當羗

命春郊駐

蹕禮元戎拜爵新封一等公藏甲冷消

丹穀雨

賜衣香帶綠楊風人歸雪嶺松州外名振天彭井絡中

宛馬不須來絕域只今眞數貳師雄

蠻雲黯黯隱機槍萬里天懸一線程設伏曾傳班定

遠屯田終賴趙營平始知

唐帝無三宥在昔商王有四征安堵臨邊諸郡縣月明雞
犬不聞聲

恩敷四塞遠夷賓邊鄙寧容梗命民蝸角方憐蠻觸鬪

虎嘯旋作壓蛋親解川互相構禍大兵命險因地設

終成虜兵自天來若有神峰起鳥驚何足惜網門三

面仰

皇仁

黑山門外野花開風送降旛向

帝臺十載頻煩

天子計一朝真作遠人來旌麾駭目雲中出鼓角驚心地

底回傳

詔幸寬驃信死俚柔相望莫相猜

綱語謂會日驃信民曰俚柔

兵歸部曲將歸朝大渡河邊霧盡消岱岳雲開迎

翠羽泮林春曉集鳴鶡聲騰異域雷霆走光被中區日

月昭

聖世從知無棄物好攜金管奏簫韶

塞鴻

塞鴻如落葉點點下寒林雨歇邊關冷雲低海國陰誰能

經遠路不自起秋心人夜還啼月家家倦擁衾

小立

小立茅簷下天空月上遲濕螢明露葉驚鵲墮風枝投筆

址司馬浮家范子皮未除詩酒累行止復誰期

無病

無病長如病經旬懶出游祇餘清夜月時作故鄉秋淚墮

依風馬心隨戲海鷗山林與廊廟莫使此生浮

家大人赴都公事期以八月還轅九月矣尚未見至
因賦此詩

三十猶貧賤羞稱七尺強詩書淹薄力衣食累高堂白髮
忘辭瘁黃花已報霜昔賢懽負米淒斷九迴腸

飯罷檢簪崖書作此寄之并呈視北

用少陵韻

自從兩載來平州形骸日放無拘束故人猶將萬里問虛
北擲金不計辱滄海雲沉鯨浪翻長城月死狐妖哭千首
草堂幸相語數篇漆園還許讀時逞勞筋跨前馬未思煖

臥求燕玉關門一夜秋風起庭前催放數枝菊一杯獨把
向黃昏童子開門秉絳燭千錢人自難下箸晚食我亦復
當肉所悲離絕知音久雙丸暗裏擲空速曾踏長安車馬
塵非才事事不如人捷足欲舉先躡蹬高門許入還逡巡
幸從看飲南山羽健卽蹲垂東海綸仇俗不知錢子母防
病粗具藥君臣浮情遣去夢魂悅新句得來意氣振不損
不益壯且老一裘一葛冬復春吁嗟簪崖故公子英風艷
心今誰比晴霞樓閣倚螺山夕照鞭韉踏虎市鷓筍乞得
緜么絃婪尾把來書淨几于將雖埋寧久藏騏驎偶蹶終

當起會看噓氣自爲雲絕笑懸車空待水成名肯不齊前
人賸馥還堪丐後死此語爲致城南蘇大雅欲墜須人扶
莫耽殘月曉風韻老却一代英雄軀

讀明季遺聞書後

七朝舊事莽相仍江水東來識廢興破漢平吳辛苦業始
終亦復在金陵

秋柳疊漁洋韻寄霽軒師時師以罷合後猶羈滇中
何事能傷宋玉魂一枝殘照失青門誰憐此日風霜色盡
是當年雨露痕淡淡秋光來遠浦綿綿離恨起孤村臨歧
已自成憔悴堂後笙歌莫更論

淒淒白露已爲霜不盡空濛遶玉塘殘杵乍驚烏鵲樹春
衣半疊綺羅箱戟門何日迎天子樂府誰家唱憲王枝
寒波枝上月惱人秋色太平坊

無復濃陰待染衣秋風江上景全非月明荒驛清笳繞雨
霽寒城過雁稀腰影漸隨霜影瘦笛聲遙帶角聲飛逢人
莫悲零落自古榮枯兩不違

枝葉葉盡堪憐不見紅樓鎖綠烟秋苑更誰驚黯淡遠
天空自夢芊綿金城淚墜攀條日陶令門扃拂綬年試續

子山枯樹賦隨風一寄瘴雲邊

丁酉

京邸晤房師屠笏崖先生出示近作蛇字韻詩七首
依數次之

客中莽莽度韶華風捲萍踪未有家回首綠迷書帶草關
情紅負筆椽花東山康濟時猶晚北海扶搖路正賒敢情
緇塵京洛地寸珠鬱屈養靈蛇

羣英斗石較才華虎氣龍文各一家欲織黃姑機上錦育
沾天女散餘花師門久幸淵源接子舍還欣歲月餘愛通
柳州說韓語能將赤手捕長蛇

鄉書倏復報京華愁極還憑酒作家日落高峰驚鴈影夜
深孤館對燈花春多似水偏無賴夢好如雲不更賒幸有
同袍相慰藉爲蛇猶自解憐蛇

淡蕩春風轉日華黃金臺畔旅人家那期更立門前雪一
笑兼看指上花首薦昔憐蘇軾忝後堂今異戴崇賒銅壺
漏永頻催燭不用金鈎掣墮蛇

吾師聲望舊清華萬里之官遠去家秩滿頻年惟載鶴春
畱小縣盡開花北來歲月幽燕戀南下風濤楚蜀賒撫事

長吟一千字崑崙三匝繞修蛇

蘊將秋實發春華翰墨人間老作家出語但驚聲中律讀
書羣羨眼無花任教客入吟壇滿不遣愁侵酒興賒醉墨
淋漓還自寫牀頭奇字走龍蛇

論齒初踰鄧仲華無由拜袞向天家自拚價敵林中桂多
恐津迷洞口花沒浪海鷗心太遠嘶風櫂馬志偏賒春來
元髮愁窺鏡聞道光陰赴壑蛇

元宵後一夕陪石渠時田兩太史暨綱齋大尹小集

秀川水部寓齋

故山皆萬里良夜恰三更已過傳柑節猶傳爆竹聲地偏
知斗正寒重覺衣輕自惜青衫客追隨也任情
踏遍天街月來過水部家鄉愁虛鴈翼客話落燈花紅醉
烏程酒香分日鑄茶去年當此夕獨自倚龍沙

曉行

喔喔雞催曉明河尚在門乍醒床上夢微辨樹邊村市遠
無人語沙平有路痕紅霞天際結漸欲擁朝暾

葫蘆河

葫蘆河畔草初生魚海南連雁塞平十五年前詩上景今

朝真向景中行
永平郡郭聞鐘

蕩蕩古盧龍
孤城鎖萬峰
河流吞郡濶
草色入關濃
國已迷肥子
碑猶紀慕容
臨邊無限感
坐倚一樓鐘

李將軍射虎石

日暮黃雲滿
蒼然馬首橫
負嵎猶有力
飲羽竟無聲
白草連天暗
長風捲地平
當年飛矢處
氣已奪樞精

虎乃樞星之精

清風臺雙松歌

賢人去已久
慘淡舊邦國
落落清風臺
雙松猶古色
一株

奮起獨驥首
凌空欲挾風
雷走一株據地形
蜿蜒輯鱗縮
爪噓雲烟
不知經歷幾千載
或自西歸就養年
一枝一葉足元氣
無古無今相映蔚
豈有神明爲呵守
由來愚賤同悲愴
吁嗟乎尼山老檜餘
枯根孔明廟柏今
何存雙松雙松吾再捫

出喜峰口

四月渡桑乾
風生馬色寒
目窮雲泱泱
心折路漫漫
柳色渾相似
桃花半未殘
妖姬工欺客
含笑出廻欄

山海關

金華山志言首集
樹羽上參天關門落照前海山爭一徑遼薊劃當年綠隱
龍庭草青消鹿磧烟空嗤秦氏堞辛苦爲防邊

秦皇島望海

目力所難極濛濛今古青乾坤生積水風雨落南溟坐撫
成連操空悲帝女靈祖龍鞭處石萬載有餘腥

思鄉橋

楊柳千枝復萬枝思鄉橋上立移時茫茫我亦思鄉客轉
爲鄉遙不敢思

野店中有以瓦盆貯芍藥者戲成一絕

脉脉春生野店門折枝猶自帶王孫如何絕代無雙種肯
插田家老瓦盆

瓶中芍藥

劈雲新露數枝紅羨殺東皇點染工乍解啼粧容旖旎才
經出浴眼惺忪二分春醉揚州月一握香傳鄭國風折伴
屏山日相對夜深隨夢媚簾櫳

客久

客久鄉音未覺移踈狂名已衆人知薄遊關塞三年裏倍
惜鶯花四月時詞賦劣會逢狗監過從多豈厭牛醫朱顏

明鏡如相值可遂霜能點髮絲

小酌陳雪嶺齋中

村逕雲平樹色疎一枝枝拂草元廬休言斗室無餘物
几橫堆讀破書

鯉魚堆案肉堆盤已是儒生好食單何似揚州愍太守
袖中攜出聚香團

田頭麥子半青黃摘向櫻廚粒滿筐碌礮一聲齊作粉酒
闌風送午餐香

蒙山葢淪定審姿團扇風微暑不知且向豆棚瓜架底一

回閒坐撒胡荽

還樂亭後南園有詩送別依韻奉酬一首

近關新柳未成綿三載空揮祖逖鞭寒月亘天回雁影春
潮突岸長龍涎故鄉久已迷雲外餘事何堪挂眼前重得
仲文遙慰我不知身在海東邊

登審臺卽至陶然亭

對此還應賦快哉秋風萬里獨登臺宮中樹挾晴雲出塞
北山隨返照來屈子騷成徒有恨賈生策廢尙餘才故園
回首黃花在正伴疎窗冒雨開

陶然亭亦近窰臺秋老燕畿旅鴈哀城闕嵯峨橫晚霽關
河蒼莽入空杯當年枉市千金骨何處能容八斗才欲繼
風流前輩少側身天地此徘徊國初諸老多
向此登高

南園太史見予出關諸作謂其高濶雄厲一洗從前
流美之習枉贈七言長句一章依韻奉酌

環山抱海地誰如控引三韓接帝居偶出秦城瞻勝概閒
攜魯酒醉遺墟邊關客久工騎馬雄劍恩深恥著書獨有
臨風悲感日詩人習氣未能除

疎狂我輩復誰如破衲沙頭感索居忽發長歌動山海乍
驚晴雪滿郊墟征遼跡已迷唐代射虎名猶紀漢書此地
從來重豪俠腰間白羽不會除

柬陳雪嶺索畫

雨窗含墨寫風枝自是君家畫裏詩我欲攜將滇海去臥
遊如見解衣時

筆端雲樹晚蒼蒼落葉村通一徑長宛似家山好時節斜
風細雨近重陽

秋懷

霜落龍庭木葉紅無端歲月去匆匆回思二十年來事半

在黃梁曉夢中

竹柏森森自作行小亭如舫泊平岡菊花窻下侵朝坐山色高寒滿一床

收盡黃雲晚稻平乍涼天氣未霜生方書寫罷無餘事時與田家話月明

綠繞沙堤一徑幽晴江秋淨碧如油偶牽釣艇前灘去半酒歸來向婦謀

夕陽村舍暖溫暾地近青山俗尚醇農事已完相勸勞瓦瓶量酒割生豚

所患都由有此身三年踏遍帝京塵掉頭容易成歸計只恐名山也笑人

得南池書

風緊雲寒雪在門故人書札報黃昏青氈竟入羣偷手綠綺空傷獨夜魂我僅栖遲猶自惜君方委頓復何論摩挲不信真如此重整銀缸辨字痕

書中談及斷絃被盜諸苦况

病言

忍病蕭齋一月餘寂寥誰與慰離居穹廬雪黯牛羊伏大漠風嚴草木疎坐撥寒灰支藥鼎閒尋秃筆寫方書尊前

金華山志前集
莫怪多惆悵景物關情歲又除

鄉愁

落落天涯守一經當杯容易感飄零
名山約自懷禽慶皂帽人誰惜
管寧歸去來今三徑渺歲行盡矣
一燈青東鄰急杵西鄰笛併作鄉愁不可聽

題雪嶺集後

沙鳥月明呼客夢
野花香風定伴僧閒
雪嶺南樓楚雨吳江水各有詩名天地間

戊戌

病起

區區客舍小於舟病起如消積世仇
拜爵新除詩作伯銘功特建酒爲侯
書經覆讀有餘味心到粗安無別愁
又被東風催出我看花預計十年遊

秋林盤馬

人與馬同心蕭騷葉滿林平蕪浩無際
秋氣莽相侵割以驚風裂恩因戀棧深
玉門關外望寒日白森森

玉田道中

種玉田何處車塵漠漠紅山形趨大澤
雲氣冷高空春動

鳥先覺冰消岸漸融兩行堤畔柳掀眼向東風

無夢

只有夢相逢連宵竟無夢慣作不眠人孤衾如鏡重起挑
床畔燈坐待東方動

睡起偶得

空齋睡起怯衣單又見秋風攪畫欄離緒紛於雲出岫年
光急似水歸灘窗懸宿雨瀟瀟下簾捲輕陰淅淅寒病到
始知身是客更無人與勸加餐

數日未見玉圃命僕往偵謂其博興正劇因作四絕

句招之卽以誌諷

暑窗風定日如年猶有愁人壓被眠聞道阿龍正豪宅呼
盧聲急不論錢

縱酒曾遊六博場里人都識次公狂年來未老心先嬾舊
事如雲一笑忘

空聞彥道拔宣武幾見元規贖太真百萬不能供一擲自
憐無補費精神

枯碁一局琴三弄門掩楸梧午氣清名教中原多樂地區
區何足較輸贏

送硯北南還因寄南池簪崖弁呈南園太史

喜接嵇康袂兼收向秀書故人皆若此吾道復何如白酒
彈長鈇黃花守舊廬寥寥數朋好出處計全疎

不須論去住同有淚沾襟聚散一杯酒蒼茫千古心雲埋
關樹黑月落海城陰回首滇南路秋風亦暮砧

玉圃將辭予而歸矣先一夕置酒餞之漫吟五律二
章卽以誌別

束髮看同輩如君復幾人明朝一揮手萬里各傷神匹馬
黃河曲扁舟漢水濱無須念居者前路有風塵

四載天涯客因君感滯淫剪燈秋坐雨支枕夜聞砧破甑
拋前事空潭映此心荆江上路時有夢相尋

送玉圃宿長新店以詩畱別依韻答之

不送故人出安知秋氣深黯然當此地行矣復何心客路
衝寒雨鄉情逐遠砧銜杯如我憶爲寄小山吟

別意

秋色撩人柰酒何消魂况聽祿兒歌驚沙落日垂楊岸自
古離情此處多

握手尊前無一辭相逢何地復何期董公巷外風兼雨不

許離人立少時

過思鄉橋

秋風秋柳玉田城
傍晚猶驅款段行
生恨思鄉橋下水
照人顏髻太分明

晚抵沙流河

馬首接賓鴻
栖栖渤海東
野禾催白露
荒驛近無終
地曠星光大
烟明日氣紅
書生易懷古
把酒酌西風

戴家河

秋村木落有餘清
繞屋渟渟一水明
毛豆滿畦瓜滿架
干

予何事太歡生

秫籬欹側路橫斜
滿地蕎花夾菜花
場上有人依樹立
亂蛩聲裏絮庄家

曉雨

客路偏宜曉雨羊
裘恰稱新涼風
蟬過夏猶噪
林葉無霜自黃

迷路

記是曾行地茫茫
柰此何荒村無定路
積水有新波
雨歇沙猶濕
天寒雁不過
臨歧羞下淚
誰更惜蹉跎

車中漫興

雲樹遠濛濛烟消碣石宮故山渺何處長路足秋風地扼
灤河險天垂落照紅如聞大言賦一劍倚崆峒

渡灤河

竟自空歸去蕭蕭渡此河名心因病減客恨入秋多技已
窮三策狂能續九歌臨流頻問影真合老烟蘿

閱滇黔紀遊書後

開卷忽來彌渡字遂教鄉思眼前飛寒山萬疊江千束紙
上相逢也當歸

故人家傍黔山住才見山名眼便開山畔高樓樓畔月夜
深時有夢飛回

送李錫九南還卽寄譚通守雨亭阮文學肅齋弁示

花貢士玉圃

滿拽雲帆下潞河吳天霜落雁聲多二分明月揚州郭飽
聽濃卽一曲歌

洗粧樓畔草如烟夜夜春風醉管絃歌舞未終人散盡空
餘壁月照嬋娟

肅齋風調老能豪酒冷燈斜月已高猶倩玉兒教一曲紫

檀槽按鬱輪袍

一時名士坐間收玉笛聲中酒似油爲寄雨亭譚別駕永

州端不抵台州

雨亭原判台州今補永州

聽罷楊枝又竹枝錦屏爭擁玉參差燕畿無限消魂事多

在花紅月白時

三載同驅京洛塵我畱君去易傷神官閒莫訝無供給較

勝天涯租穩人

時錫九歸里以廣文卽用

歸到龍山杏已花鳳凰橋上酒帘斜同人問我憑君道狂

漸消除懶漸加

酒無庸斷與全婪近况如斯君盡詣若到荆河逢盛覽挑

燈莫吝一宵談

南園太史遺瘦馬一軸賦呈長句二章時蓋戊戌九

月也

由來龍性本難馴落紙爭看騷裏身遂使寒空動烟雪總

無凡骨在風塵甘泉露綴葡萄紫沙苑雲蒸苜蓿春若駕

鹽車寧伏櫪蕭蕭鳴向抱鞭人

錦泥珠勒未應違那肯垂頭臥夕暉星有王良能合德世

無支遁祇憐肥識途羞向秋林老破陣思隨曉角飛羨絕

金華山詩集
天閑三萬騎班班齊扈翠華歸

寫懷六首寄玉圃

多少心中事何能一筆書逢迎君自拙禮法我尤疎客路
滄江外離觴白露初自茲成索處誰念病相如

自返京西轡離悰覺倍深明河塞虛老屋擁秋林重以
三更角能淒萬里心挑燈坐無寐數儼碧雲吟

記否漁陽路銜杯興最豪舞憐張靜婉歌詔鄭櫻桃暝玉
翻紅袖春花簇絳袍邇來俱寂寞空對月輪高

念爾黔陽郡攤書好閉關北風千樹雪斜日一樓山柰可

分襟去空悲獻策還金臺明歲酒剪燭話重攀

百年吾輩在今古任悠悠世事宜高枕生涯且敝裘千山
黔筑雨雙杵白狼秋何日隨潘岳春城載菓遊

得書春草芳寄書秋葉黃臨行復拆看淚下沾衣裳白日
懸孤竹青天合夜郎離居同有嘆我獨在他鄉

讀三國志書後

無限書空事尋行感易生羣兒自相貴豎子竟成名黨禍
傾厨顧天心急戰爭漁陽搥最好單絞氣縱橫

灤河口號

曉霜初日首頻回野艇如梭待客開生受灤河千尺水照人無恙去還來

晚行豐潤道中遂宿野店

驅車復驅車川塗浩無際微颺起西北襲人有餘厲日落沙樹蒼燕代共一氣發軔苦不早卽次難遽至四顧何莽莽野濶星在地寒燈射茅簷門壁祇略具得此良亦足遑復求其備擁劍眠槽頭雞鳴跨劍去

沙流河題壁

一年三度歇征鞍坐倚明燈興未闌綠酒行杯虛此夜時

禁酒紅牙點拍有新懽天垂碧漢當軒落風捲青霜入檻寒歲月如波身易老誤教人作冶遊看

別山旅次和壁間韻

未向青門學種瓜雪飛如席尙天涯窺臣夢記東隣月送客魂消上已花屢欲投珠人按劍頻驚射影蛾含沙心頭事到難成寢寒雁聲多燭易斜

抵都後賦呈唐葯洲先生

二十年間事消沉向冷曹餉軍空紀績緬甸之役先生曾以廣文轉餉龍陵醫世詎辭勞先生精岐黃術白首詩名大青山酒興高偏多遲暮

感不屑賦觀濤

寄玉圃

到門端不負清秋山繞城東甲秀樓樓上看山休念我黃
雲落日古營州

寄弟

夜窻風急雪侵廬剪燭親栽憶弟書料得毗離江上宅小
陽春正試花初
爾依萱背我椿庭風雨天涯歲屢經却喜閒曹無冗政郎
官星是老人星

已定歸期在後年素馨棚畔竹林邊老親對我常常說結
座茅亭榜樂天

須知稼穡之艱難豐歉都從勤惰看縱是帶經鋤亦可山
田十畝一家餐

棗林題壁

舊館重來路不迷茅簷新插屋新泥斜行隱壁猶堪認記
是當年醉後題

晚抵南臺

寒樹遠蒼蒼天圍斷磧黃羈人倦行役前路正斜陽野濶

初消霧風嚴欲釀霜莫沾村店酒飲罷倍思鄉

長至日行後營道中

至日吾鄉好家家盡辦冬雞豚交問勞禮數自從容背可
簷前曝花多路口逢別來都是夢人在古盧龍

望仙詞

路隔蓬瀛尚幾千桃花開處日如年瓊樓亦在人間世才
得登臨便號僊

門有車馬客

南山射虎乍歸來又挾名倡上吹臺我自縱橫君莫笑漢

皇方用軼羣才

揮盡千金興尙豪五陵風緊雪滔滔客來共貰新豐醉只
解貂裘不解刀

十一月紀事

我家西南山水窟坐閱四序和且妍冬至後亦號數九擁
褐夜抱紅鑪眠性非好熱乃畏冷茲復北走來幽燕以五
行論位在坎帝宅元冥尊其權威驅萬類咸伏匿朔氣塞
野橫青烟時值晴霽一窺戶颯人肌骨窮雕鐫曲房深閉
火不斷凡三易歲皆無愆今歲自謂亦復爾豈期氣候有

變遷大雪已過雪未落河流活活冰無堅初日照舍開鳥
雀况見蠅蚋飛喧闐蒙茸之裘卸弗御西窓棊喜無折紆
午窻飯罷汗浹背布袍七尺裝微棉吾鄉正月頗似此只
少梅花開眼前或者天心眷羈客縱以遊眺良踟躕但念
舒歛關至道寒燠交濟化始全當寒不寒物不實農將輟
未悲春田安得冰雪重布獲無使今年殊往年卽令受凍
亦所樂呵筆爲寫寒風篇

出都日南園太史以詩送別依韻寄答并呈西阿檢
討九山庶常

生年六十將至半不如意事已八九跨谷馳坑了不擇禮
法於吾更何有南園太史殊好事相見輒復醉以酒詩成
徃徃道弗置多可少怪情獨厚棘門之軍兒戲耳安得旌
旗比細柳况無挂腹五千卷只見捉襟時露肘以此不遇
安足歎問天時爲搔蓬首昌黎能薦孟東野李勉終收王
李友感此彌增遊子愧養親何日博升斗且復趨庭向海
隅身隨秃筆自相守三載不回視虱目千金更學屠龍手
凡骨匪用金丹換再落風塵尚誰咎鴻篇勗我讀萬遍銘
之帶席楹戶牖彼將相者豈所志

南園句云他時
會來取將相

肯甘聊

備盟心久

冬夜有懷

斜漢橫天夜欲闌
愁人起向月中看
十年前事頻棖觸
悄拍鴛肩問晚寒
雲散萍流歡愛阻
百花山畔啼秋雨
別時衣尚篋中藏
珠淚斑斑紅可數

不得玉圃書有作

索居歲欲暮不得黔陽書
到家已三月肥瘠當何如
蕭條督亢陂前路目送雙輪倚秋樹
西風吹雨散如麻
遙記君從雨中去

對月

片月白漫漫偏宜獨夜看
有懷時倚幌無寐只憑欄
影瀉中天碧光分曉鏡寒
記從爲客後四十九回團

冬夜檢近作仍用南園太史韻

兒時好弄如昨日匆匆忽至二十九
東亭秉節正此歲我猶雌伏無一有中郎階
下徒倒屣子雲門外屢載酒天生狂質當有意
恐老蓬茅負高厚記從省親東海頭衙齋四見絮飛柳書經再上不得意耻與俗士並肩肘走馬秋出長安城落木黃雲倦回首以詩過日吾事足唐歟宋歟師

或友山稱嵩岱水淮河南星惟箕北惟斗元氣磅礴滿胸臆尋行那肯學墨守成醫必過三折肱作賦空驚八叉手此道貴樸且忌雜進苟躡等誠所咎古心獨鞭知亦罕有如窺月僅在牖吟罷閣筆三太息塵中之人睡已久
己亥

賦得何處春生早二首

秋窓夢語刪稿

何處春生早春生旅客心草痕隨夢遠花氣入愁深醉許依墟臥狂能刻燭吟難勝風蕩漾對景怯披襟
何處春生早春生美女粧桃花輪頰淺柳葉鬪眉長日照

金閨暖風吹繡榻香回腰倦無力催辦嫁衣裳

人日偶作

雁歸花發感如何又見春從戶外過五度天涯作人日離家已比道衡多

長安女兒行

長安女兒罷新粧珠簾翠幄雲母床碧紗窗外鳥亂語桃花滿院春風香悄出紅闌映花立仰面看花背花泣欲言不言但盈盈似恐容華易朝夕忽聞阿妹前致詞干花何事淚如絲勸姊將花作夫婿只有相守無相離一笑回身

金華山詩集
上階去掉頭且復呼妹住妹年若與姊年齊亦解含情對
芳樹

水僊花

疎花翠葉曉離離冰雪聰明水月姿合與江梅作兄弟清
標共占歲寒時

顧影猶憐格韻新一生端不識紅塵凌波乍弄江頭月誤
被詩人認洛神

懷陳雪嶺秦中

霽雪遙連太白高卽今意氣向誰豪文人自古多依幕遠

客經年已敝袍閒對雕籠弄鸚鵡坐呼春釀撥蒲萄伊涼
水調還如昔聽處能無憶我曹

清明曲

坐倚閑門數暮鴉紛紛桃杏出墻斜春光似覺今年早才
到清明遍見花

立秋

四載盧龍感滯留西風又送滿庭秋天垂紫塞樓臺迥地
壓東溟日月浮欹枕尚容尋好夢引杯差足抵閒愁眼看
時序奔輪速秉燭如何不夜遊

秋夜

吟興逢秋健離情傍晚多
懸窓邀素月捲幔落明河
坐覺千林暝微聞一雁過
幽蘭紛意緒爲續郢人歌

開酒

閉窓寂歷俯秋垆扶病重
開酒一瓶心悔昨非今
已是眼看人醉我何醒
浪翻遼海連天白山擁
秦城拔地青北似步兵
多儻塊深杯入手不教停

枕上聞蛩

酒醒藤床燈復張一聲聲
入九迴腸青袍似草人
將老秋露如珠夜未央
才訝越吟喧素壁旋驚
楚調出橫塘家山聽爾
猶生感柰可爭啼向異鄉

夜笛

黯黯盧龍塞窓虛片月橫
西風逼高枕涼笛湧秋聲
頓攪離人夢還增獨夜情
落梅兼折柳曲罷不分明

晚蟬

病枕眠難定淒涼旅客情
小軒千樹合斜日一蟬鳴
已帶清商至能催白髮生
如何當月落猶曳別枝聲

鄰砧

金華山志詩前集
秋氣感人多愁生一片石有聲忽無聲纖手嬌欲折西風
吹又來月落霜天白

寒雁

一夜霜催林葉紅雁聲忽墮枕西東
病客軒窗橫夕照美人庭院生西風
西風夕照迢迢路歲歲春回秋又去
青天無際碧雲深飛入蒼茫不知處

憎藥

生死何關藥如湯手厭持方書原可信
苦口更誰知孤枕虛明月寒颺動廣墀
冤哉驅草木自演腹中師

喜涼

不有秋風到誰知病客心海山餘伏枕
天地此開襟簾捲苔痕綠窻含雨氣
深試看今夜夢和月戀重衾

喜晴

海雲如馬向南行又放蕭蕭齋一日晴
數點青山當座出半規新月傍簷生
涼侵病榻衣衾健天縱閒人步履輕
試向門前弄秋水蘆花風送晚蟬聲

齋日

索遍枯腸句不奇憑誰爲致翰林
藎園葵挹露香浮椀

稻經霜白映是願以生機還造物敢因世味縱吾私長齋
繡佛原非計淡泊差堪與病宜

中秋

一年難得此宵晴秋老榆關起鴈聲滄海潮迴通赤岸塞
天木落擁秦城已過白露猶餘熱縱有微雲未損清不識
小山萊桂下幾人相憶月輪明

野色

野色涼如此含情獨倚欄菊隨人并瘦秋與雁俱殘海勢
推窓得山容隔縣看近關霜落早誰念客衣單

重陽

塞門五度遇重陽坐對西風鬢欲蒼零露已從前月白好
花仍向隔離黃寒雲落日潮千丈微雨孤村鴈一行不用
登高回黑首旅情歸夢兩茫茫

望鴈次鏡湖韻

旅館風高木葉飛眼看寒鴈入雲微黃蘆壓塞秋初老白
露橫江稻正肥方向北庭辭曉月轉從南國唳斜暉天涯
我亦如蓬轉惟有鄉心伴爾歸

冬日偶感限韻

幽蘭媚空谷臨風屢顧影豈以知者希蓬蘆甘與並蕩蕩
君子心所重在植品何如返初服秋山課蕨笋
委懷在書劍怡情有花鳥所抱誠磴磴遵時以自葆日月
無匿照飈焉令人老揮絃送冥鴻六翮亦何矯

古意二首限韻

促膝日相對離思轉淒切芳草綠盈洲行與之子別贈以
連枝帶報以同心結帶結何足言兩情似秋月
莫結長相思相思令人瘦千行萬行淚盡化雙紅豆願作
釵與釧日在君左右勸君一尊酒金石爲君壽

題同聲集後

寒月入簷天欲曙春風破蜡柳先知元和體格松陵集海
上重傳疊韻詩

除夕限韻

病起頗好靜爆竹遽無賴始知是除夕隣里歡聚會眼看
小兒女牽母索衣帶感此淒心脾長歌發慷慨燕山亦云
遠我更燕山外嚴霜凍滄海黃雲壓紫塞日月兩奔丸如
波不相貸寄語鄉中人慎勿樂行邁
低頭憶家山舉頭對明燭明燭何輝輝照此病餘日忽聞

慰藉語乃以調笑出丈夫志四方寧若豕與鹿苟旣同覆
載豈必判區域况奉白髮親相依有骨肉至人絕喜愠達
士空寵辱胡爲效兒女珠淚欲盈掬莊言雜溫語油然感
心曲起索管城子分題共追逐詩成勞我酒金尊淡淨綠
坐待紅輪高春光媚華屋